



A Goàrdia da Sànt'Ànna

A RIVÌNCITA DO DIÀO?

di Piero Bordo

A ròccia “**madre**” do Mònte Fighéugna a l'é de quèlla che s'a vègne agredia da-i agénti atmosférici a se désfa in tòcchi ciù ò mëno gròsci. Gh'é di sentê che te pâ de caminâ pèzo che in scê bilie. Un de quèsti o l'êa ciamòu “o strazétto do diào”: o comensâva a quòta 685 mètri, dòppo Sànt'Ànna (1) e o l'arivâva a-a Capèlla da primm'apaiasciòn da Madònna a-o Benéito Pài.

O strazétto do diào o l'êa l'ùrtima dificoltæ primma d'arivâ a-o santoàio; o l'êa drìto e ripido e ti ti caminâvi, con tànta fadìga, in scê priète stócæ che no stâvan fèrme e te fâvan pèrde l'equilibrio. Dêvo però dîve che mi, che i sentê da Goàrdia l'ò fæti tùtti e in tùtte e stagioin, quànde arivâva a-o santoàio dòppo avéi fæto o strazétto do diào, me sentívo bèn perché me pâiva d'avéi fæto za 'na penitènsa pe-i pecoéi che andâva a confesâ.

L'é pe quèsto motivo che m'é rincresciòu quànde, inti ùrtimi ànni do sécolo pasòu, ò visto che a “Comunità Montana Alta Val Polcevera” a l'âiva fæto di travàggi inte quèlla zòna: a l'âiva adòçio a montâ faxéndo di gjétti (in italiàn se ciàman “tornanti”), a l'âiva fæto di scæn, misso de ringhêe de légno, de banchinn-e e dapeu, atacæ a di pâli, a gh'âiva scistemòu de ciàppe con scrìto e beatitùdini.

A Gèxa dòppo avéi cristianizòu tànti pòsti e tànti mónti, a l'âiva fæto o stèssco co-o strazétto do diào, cangiàndolo in Sentê de beatitùdini.

Ma òua vegnimmo a-o perché do titolo de sto scrìto chi. 'Na matinâ d'agòsto do 2012, sòn montòu a-a Goàrdia in pelegrinàggio e, voéndo védde a nêuva “Salita del Magnificat” che, pe chi mónta a pê, a colêga a Capèlla da primm'apaiasciòn co-o santoàio, partindo da-a stàtoa in brónzo do Benéito Pài, sòn pasòu da-o Sentê de beatitùdini ascì. A l'inìcio ò dovüo fâ 'n'inchìn pe no fâme pètenâ da 'n gratacû (2). Dapeu ò trovòu o sentê infrascòu, ringhêe fèua de pòsto, banchinn-e scivertæ e invâse da-e òrtìghe, scâvi lóngo o sentê provocæ da l'ægòa che cêuve e che a no l'é regimentâ (no gh'é de canalétte che màndan l'ægòa



Scâvi lóngo o sentê provocæ da l'ægòa che cêuve e che a no l'é regimentâ (no gh'é de canalétte che màndan l'ægòa de fèua da-o sentê) e alôa l'ægòa a chinn-a lóngo o sentê, scavàndolo